

儀  
顧  
堂  
續  
跋

儀顧堂續跋卷四

歸安陸心源伯剛父

元槧禮記纂言跋

禮小戴記三十六卷題曰臨川吳文正公纂言前有目錄題曰臨川吳澄幼濤敘次後有元統甲戌門人吳尙跋每頁二十行每行二十二字經頂格註低一格蓋是書初刊本也觀澄自序蓋本朱子與呂伯恭商訂之意而爲之其篇次不依舊第以一篇爲一卷曲禮一內則二少儀三玉藻四深衣五月令六王制七文王世子八明堂九喪大記十雜記十一喪服小

記十二服問十三檀弓十四曾子問十五大傳十六  
間傳十七問喪十八三年問十九喪服四制二十祭  
法二十一郊特牲二十二祭義二十三祭統二十四  
禮運二十五禮器二十六經解二十七哀公問二十  
八仲尼二十九孔子閒居三十坊記三十一表記三  
十二緇衣三十三儒行三十四學記三十五樂記三  
十六以大學中庸程朱表章爲四書投壺奔喪爲禮  
之正不可摺之于記冠義皆義鄉飲酒義射義燕義  
聘義六篇正釋儀禮別爲傳附儀禮後故皆不列凡  
先列前儒之說而後下己意者以澄曰別之經下不

列舊說則否吳尙跋述澄之言曰吾于禮記纂言凡  
數易棗蓋亦多所發明而月令檀弓尤爲精密若月  
令言五時之祭所先不同天子所居每月各異檀弓  
中生之死延陵季子之哭曾子之易簣子思之母死  
于衛子上之母死而不喪數節是皆諸說紛紜不合  
禮意研精覃思証之以經裁之于理自謂可無悖戾  
云蓋草廬頗亦自喜其書危素草廬年譜謂書成于  
至順三年虞集作行狀謂成于至順四年吳尙跋有  
云先生親自點校未畢而捐館與虞集說合付梓時  
草廬之甥周濂孫吳當及尙司校訂之役而宋元學

案不列濂尙二人之名亦缺典也卷中有毛晉字子晉一名鳳苞字子九白文方印汲古閣三字白文方印海虞毛氏秦叔圖書印朱文方印毛晉之印朱文方印子晉父白文方印毛表朱文方印字秦叔白文方印虞山毛氏汲古閣藏朱文方印季振宜藏書朱文長印毛晉之印白文方印字子晉朱文方印御史之章白文方印季振宜印朱文方印滄葦朱文方印蓋先爲毛子晉所藏分授其子表表不能守歸之泰與季振宜道光中歸于上海郁氏余从郁氏得之雕刊工整字皆趙體元刊之最精者

元覆宋槧本四書跋

大學一卷中庸一卷題曰朱熹章句大學或問一卷  
中庸或問一卷題曰朱氏論語十卷孟子七卷題曰  
朱熹集註論語版心或題晦菴吾註或作晦菴論語  
孟子版心間有晦菴註孟晦菴註孟子等字大學版  
心題晦菴大學中庸版心題晦菴中庸章句前有刻  
四書凡例每卷後有音考每頁十四行行大字十五  
小字雙行版心有字數凡一節之義一章之旨一篇  
之凡皆有旁抹經中衍文依朱子孝經刊誤之例子  
字之外加圓圈誤字加方圓主意字眼則加上下圓

左右直之圖注中宋人避諱改用之字則加方圓段  
則以畫句則以圓蓋元時常州刊本其圓抹之法兼  
取勉齋黃氏北山何氏魯齋王氏導江張氏諸本之  
長音攷則宣城張師曾所爲也見楊士奇東里續集  
卷中有周笈私印白文方印毘陵周氏九松迂叟藏  
書記朱文長印周良金印朱文方印案周良金自號  
九松迂叟嘉靖中常州藏書家也

北宋槧說文解字跋

說文解字十五卷題漢太尉祭酒許慎記銀青光祿  
大夫守右散騎常侍上柱國東海縣開國子食邑五  
百戶臣徐鉉等奉敕校定宋槧宋印本後有徐鉉進  
表雍熙三年牒每頁二十行每行大字二十小字雙  
行每行三十字不等版心有大小字數刊工姓名間  
有重刻之頁版心有重刻字恒貞等字皆不缺蓋眞  
宗時刊本也後有阮文達隸書手跋云毛晉所刊卽  
據此本凡有舛異皆毛扆妄改愚謂平津館所刊卽  
祖此本行款匡格皆同孫淵如作序謂毛刊祖大字

本與阮說不同以今証之似以孫說爲是卷中有青  
浦王昶字曰德甫白文方印一字述菴別號蘭泉朱  
文方印大理寺卿朱文方印經訓堂王氏之印朱文  
方印阮元私印白文方印卽百宋一廬賦所云王司  
寇極加寶貴者也段懋堂大令作汲古閣說文訂亦  
以此本爲據其善處已詳言之矣

宋本廣韻跋

大宋重修廣韻五卷前載景德四年勅牒次大中祥符元年勅牒次陸法言序次長孫訥言箋注序次孫愐唐韻序後有雙聲疊韻法六書八體辨字五音法辨十四聲例法辨四聲輕清重濁法每葉二十行每行二十字小字雙行每行廿七八不等宋諱玄朗匡胤昞禎皆缺筆徵頊佶桓皆不缺蓋仁宗時刊本版心有字數刻工姓名每卷後有新添類隔今更音和切數字以張氏澤存堂刻校一過乃知張氏所據與此本同而有增有改有缺有誤其改者如卷一東字

下舜有七友宋誤土支四江縱短矛也宋誤打鐘鼓也之類其增者如十二齊僞上同又子儻鳥出蜀中張于儻上增鸛文而以子儻鳥出蜀中六字屬之以上同二字屬儻六脂紙下補岷文卷三二十四緩料下增餅文之類其缺者如辨四聲輕清重濁法宋本朱之余反朱赤也張本缺留墨釘宋本紬眞流反紬布也張本亦缺留墨釘之類其僞者如辨四聲輕清重濁法朱張本譌生并補盈切補張本譌府之類愚謂張所改大抵以元版廣韻爲本宋刻有譌改之是也至儻說文周燕也从佳少象其冠也尙聲鸛乃後

出俗字況元刻及明內府本張力臣校刊本嚮上皆無鵲字乎版本飯之俗字粹餌二字更後出有粹字矣何必更有餌字岷字見十二齋何必又見于六脂此皆增所不應增者也其他所增亦類此者多近見黎蕤齋覆刊東洋町田久所藏宋本與此本無一不同末三頁此本有刊工魏奇等名黎本失摹耳張刻顧徵恒桓皆缺筆與此本不同蓋張氏所見之本乃徽宗時印本經後人挖改廟諱此則猶仁宗時印本也惟黎所據之本桓字不缺避而敘目云避至桓字止何也

馮已蒼手鈔汗簡跋

汗簡七卷前有自序次七十一家事蹟卷七爲略敘  
目錄後有李直方跋及圖畫見聞志潘遠紀聞周越  
法書後苑劉向別錄四條鄭思肖隸書跋每葉十四  
行後有已蒼手跋言崇禎十四年借山西張孟恭藏  
本歲乙酉避兵城西之洋蕩村以二十日錄畢與康  
熙中汪立名刊本字迹少有參差汪本出自曝書亭  
移目錄于首此本目錄在卷七猶存漢人舊式有虞  
山錢曾遵王藏書朱文長印卽敏求記所著錄後歸  
愛日精廬者

元槧廣韻跋

廣韻五卷前有陳州司馬孫愐廣韻序序後有木記  
兩行文曰至正丙午菊節南山書院刊行每葉二十  
四行每行小字二十五大字約十五六元刻元印本  
也明永樂甲辰廣成書堂宏治壬子詹氏進德精舍  
皆有翻本行款悉同而刻工甚劣譌謬更多又別有  
至順庚午刊本每頁二十六行每行約十八九字小  
字雙行每行三十字序末有至順庚午敏德堂刊木  
記及辛未菊節後十日印七字又有建安余氏刊本  
行款與至順本同而板式縮小似巾箱本未有建安

余氏雙桂書堂鼎新鈐梓木記注更多刪節均不如  
此本之善也以黎純齋新覆泰定乙丑圓沙書院本  
校一過行款版式無一不同而此本微有奪落蓋泰  
定乙丑前乎至正丙午四十二年當爲此本所祖宜  
乎奪譌較少矣明內府本每頁十八行每行小字三  
十三顧亭林校刊本每頁十六行每行小字廿四似  
皆非元版行款是書相傳以爲陸法言原本朱竹垞  
以爲卽重修本而爲明中涓所刪削提要據明德堂  
刊駁之足以執竹垞之口不意元刊竟有五六本之  
多也

續古千文跋

續古千文一卷題曰左朝散大夫知池州軍州事賜  
緋魚袋侍其良器撰趙希弁讀書附志續千文一卷  
侍其環字良器所箸也昔周興嗣次王逸少所書千  
字爲韻語以便觀省後世謂之千文良器遷避興嗣  
所用字別製千字以續之山谷嘗報以書曰引辭連  
類使不相觸甚有功當與凡將急就並行也葛文康  
公爲之序愚案良器名環一作瑋蘇州長洲人漢廣  
野君之裔賜氏食其後有仕武帝爲侍中者因又合  
官與氏而稱侍其家世以武顯祖憲始自建業遷長

洲良器獨習儒學皇祐二年進士調杭州富陽主簿  
改開封陽武府尹包孝肅極材之檄攝右軍巡判官  
有亡命卒坐剽金論棄市良器訊其情白尹平之累  
知建德固始永豐縣通判全州擢化州移知池州致  
仕性靖退止足孤立介特以質謹自將不媚權近仕  
進淹晚一不綴懷嗜聚書自少迄老未嘗一日不觀  
工草隸善屬文賦詩尤多製續古千文行于世崇甯  
三年卒年八十三見葛勝仲丹陽集侍其公墓誌此  
本佚勝仲序今據丹陽集補錄子鉉字希聲以父任  
入仕官至知徽州亦見丹陽集

影宋羣經音辨跋

羣經音辨七卷題曰朝奉郎尚書司封員外郎直集  
賢院兼天章閣侍講輕車都尉賜緋魚袋臣賈昌朝  
撰前有寶元二年中書門下牒及昌朝自序後有康  
定二年奉旨管勾雕造銜名及慶厯三年雕造進呈  
平章章得象樞密使晏殊參知政事賈昌朝范仲淹  
諸臣銜名紹興壬戌知汀州甯化縣王觀國後序汀  
州鏤版諸人銜名及紹興九年臨安學重雕知臨安  
府張澄等銜名每葉十六行每行大字十四小字雙  
行不等版心有字數及刻工姓名前有毛晉之印朱

文方印子晉朱文方印希世之珍朱文方印以澤存  
堂刊本互校開卷卽見張刻之謬雕印進呈諸臣銜  
名稱臣乃奏進之體中書門下牒則上行下之文故  
平章參知五人姓而不名宋本張章程王李諸人之  
上無臣字張刊于每人官銜之下姓之上各加臣字  
蓋後人見進呈名銜有臣字而妄加張氏不察遂以  
付刊耳此外張本誤脫如卷一北未誤北末祭享神  
也享誤亨傍失切傍誤旁蔗庶子誤蔗莓子藏物之  
府也藏下物上行藏字居利切利誤例倚閭倚誤踣  
以犴皮飾射侯也射下脫侯字必卽天倫卽誤明卷

二學覺也學教也學皆誤歟禮惟學學半禮誤書息  
還切遺誤進其俱切其誤具烏尼尼誤夷舊本作脊  
脊誤管膊磔也上脫膊肱也補各切六字以簞卹勿  
軀簞上行策字勿下脫驅字卷三戎地也地下脫也  
字人實切實誤質期後時也後下脫時字栗裂也裂  
誤烈上旅下旅誤作上於下旅木石之怪也石下脫  
之字歎怒也怒誤恕音賤誤音踐卷四占郎古誤苦  
辟遵也遵誤違子惟切惟誤誰駟牡馬也牡誤壯羊  
胃切胃誤胃音治誤音溢束衣也衣誤本卷五辨方  
免方誤皮佛備也備誤輔婉槁滌隨槁誤橋夏后氏

之繆練繆誤綱又逋菩菩誤善絮調也調誤捕古者  
諸侯出師古字下脫者字丹朱中衣誤丹中朱衣繆  
縊也縊誤謚紹綏也綏誤援隋祭神食也隋誤隨注  
同壤自敗也敗誤毀卷六尼据切据誤許重再也再  
誤更爲調絮曰和絮誤繁徒聊切徒誤調諸侯爲天  
下脫子守土曰守是以天八字卷七天子詩也詩誤  
樂肌膚若冰雪下衍冰雪三字此龜屬鳴者也屬誤  
胃又衍而字祁當作麋脫作字雕印進呈諸臣銜名  
晏殊銜名戶字上脫一百二字後序眞奇殆絕眞誤  
直海內又甯又誤又號稱難治號誤号此外筆畫之

殊更難枚舉蓋張氏所祖抄本受之朱竹垞欲借汲  
古南宋本子晉秘不肯出而別示以抄本張氏卽據  
以校改付雕蓋別本亦出宋本改易行歟照錄而非  
影寫又經妄人屢改故脫誤如此

宋本九經補韻跋

九經補韻題曰代郡楊伯喆彥瞻集宋麻沙刊本每頁二十六行每行三十八字前有嘉定十六年伯喆自序後有淳祐四年文林郎衢州州學教授俞任禮跋案伯喆字彥瞻楊和武恭王沂中曾孫博聞彊記下筆驚人雖治郡叢劇手不釋卷嘗與竹坡呂午唱和淳祐七年以吏部郎官提點兩浙刑獄八年除樞密院檢詳文字見會稽續志紹定辛卯游九鎖山幽岩壑谷無所不歷見六帖補呂午序俞任禮跋洞霄圖志

影宋抄方言跋

輶軒使者絕代語釋別國方言十三卷前有郭璞序  
慶元庚申李孟傳序朱質跋後附劉歆書每葉十六  
行每行十七字注小字朱諱有缺筆蓋從慶元刊本  
影寫者卷二秦有榛娥之臺不脫秦有二字顛錄吁  
揚膝雙也膝不譌暗卷三斟揚計也協不訛協魯齊  
之郊謂之薨郊不譌閒譌罪也諱不譌譌卷四袒飾  
謂之直矜矜不譌矜注婦人初嫁下無所著上三字  
及音袒二字自闕以西秦晉之郊曰絡頭以不譌而  
卷五或謂之蠶下不衍蠶字或謂之荈注今云荈

蓬也蓬不譌蓬卷六謂之關注言助無所聞知也助  
不譌耻卷八鵠音域域不譌或卷十膊兄也注此音  
義未詳此不譌皆卷十一南楚之外謂之蟻蟻注亦  
呼蚝蚝蚝不譌吒咄卷十二賊脂也賊不譌賊從  
肉不從日卷十三斨刺也斨不譌斨載東原作方言疏証  
往往以曹毅所藏宋本爲証與此多同當卽從曹毅  
所藏宋本出者

影元抄平水韻略跋

新刻平水韻略五卷前有至大六年河間許道古眞序聖朝頒降貢舉三試程式二葉壬子新增分毫點畫正誤字三葉壬子新雕禮部分毫字樣二葉每頁二十六行每行大字十六小字三十二每韻後有新添重添之字以黑質白章隔之卷五後有木圖記二行其文云大德丙午重刊新本平水中和軒王宅印影寫元刊本貢舉程式內迴避廟諱據延祐元年中書省咨試期稱皇慶三年與元史選舉志合是韻略刊于大德中皇慶延祐續有增添矣點畫正誤內有宋

諱殷溝脊敬等字則所謂壬子新增者亦必皇慶壬子而非宋之淳祐壬子竹汀偶未細攷耳許道古真序云書于嵩郡隱者之中和軒而印書之王宅亦曰中和軒豈道古之序書于王宅耶抑王宅襲道古軒名耶三場程式內載章表迴避至一百八十餘字之多婦駕仙靄服布孝恩過改空忽掃慕出祭饗夢缺落典憲法遷塵亢蒙隔離去辭追考板蕩荒古述師剝草睽違皆在迴避之例此則歷代所未有也考試程式蒙古與漢人皆不同鄉試二場蒙古人策限百字漢人限千字會試二場蒙古試時務策漢人辭賦

御試漢人策千字蒙古五百字皆足補元史選舉表  
之缺元史太宗紀八年丙午夏六月耶律楚材請立  
編修燕京經籍所於平陽編集經史召儒士景陟充  
長官以王萬慶趙著副之中和軒王宅或卽萬慶後  
人歟

影宋抄押韻釋疑跋

紫雲先生增修校正押韻釋疑五卷題曰廬陵進士歐陽德隆釋疑紫雲山民郭正己校正影寫宋景定本每頁十八行每行大字十六雙行小字二十四前有紹定庚寅袁文煇序景定甲子郭守正序江西通志進士表無歐陽德隆名或領鄉解而未第進士猶孫季昭之稱進士歟紫雲山在江西安仁縣西北三十里則守正必安仁人疑爲平水書籍王文郁錢唐書肆陳思之類書中有錢曾之印白文方印遵王二字朱文方印蓋述古堂舊物也

元槩韻會舉要跋

古今韻會舉要三十四卷附禮部韻略七音三十六  
母通攷一卷題昭武黃公紹直翁編輯紹武熊忠子  
中舉要前有劉辰翁序熊忠序字允魯辨序余謙跋  
韻例七條音例五條字例十四條義例五條以三卷  
爲一冊首行書名下有甲至癸十字公紹字在軒邵  
武人咸淳元年進士著有在軒集其爲韻會也蓋以  
禮部韻略訓釋簡略博攷經史旁及九流百家增其  
注說又採異體異義辨其正俗以爲饋貧之糧而已  
其於禮部韻略九千五百九十字及續降補遺三百

四十四字之外則無增也至熊忠而刪其注說之繁  
重增其韻字之遺漏其以毛晃韻增者一千七百一  
十字曰毛氏韻增以平水韻增者四百三十六字曰  
平水韻增以經史子集可備引用增者六百七十七  
字謂之今增而後在軒原本有增有刪矣熊忠序云  
在軒黃公公紹作古今韻會本之說文參以籀古隸  
俗凡將急就旁行敷落之文下至律書方技樂府方  
言靡不悉究而又檢以七音六書凡經史子集之正  
韻次音叶音異辭與夫事物倫類制度纖悉莫不詳  
載僕館公門竊承緒論惜其浩瀚四方學者不能徧

覽增以毛劉二韻及經傳當收未載之字別爲舉要  
一編是則書中繁徵博引每字以五韻分清濁及以  
說文本字爲正而注明古作某本作某或作某通作  
某以及今刪今正今仍者皆公紹原本惟毛氏韻增  
平水韻增及今增者則出熊忠手耳楊升庵以舉要  
爲公紹舉書林韻會之要固謬或以韻會別爲一書  
而非舉要者亦未細讀是書矣熊忠序後有陳杲識  
云昨承先師架閣黃公在軒先生委刊古今韻會舉  
要凡三十卷古今字畫音義瞭然在目今繙諸梓三  
復校讎並無訛誤是則舉要付刊亦出在軒之命蓋

忠本在軒門客謂舉要亦在軒作亦何不可乎蓋公  
紹在時已命陳寔刊版尙未經文宗御覽余謙點校  
者故曰係私著之文已經所屬陳告禁約也至文宗  
見葛元鼎寫本命余謙以刊本點校非未見刊本也  
觀余謙跋可見字尤魯翀序所謂刊本快觀者將謂  
刊余謙所校之本非謂以前無刊本也此本當是以  
余謙點校本重刊者陳寔跋則以舊刊所有仍之耳  
若謂卽陳寔所刊不應有字尤魯翀余謙兩序矣明  
有重刊本行欵悉同惟字體小變耳

元槧說文補義跋

說文補義十二卷元刊本每頁篆文十二行約十注文小字雙行每行二十四字

四庫未收阮文達始進呈包希魯仕履已詳聖經室外集其補義頗似王荊公字說東字云東五行爲木天干爲甲乙地支爲卯乃木王之方暘谷之地日所出也故从日在木中東海有若木所謂日出博桑蓋指事焉故日在木上則爲杲下則爲杳𠂔字曰𠂔者二曹決事在于東庭故从二𠂔指事也下从日者以言決其獄詞也工字曰上下均齊而平中直而正

規架之象會意也有字曰从又从肉近取諸身以手  
捫肉實有者也九字曰九者十之屈也申則爲十矣  
降字曰中中者人之行步也自土之高者从自者由  
高而至于下降之義也名字曰夕者晦昧之時也非  
口自言則人不知其誰何也蓋有是人則有是名也  
故从夕从口品字曰人以口計三口者其人非一也  
人非一則必有等殺焉故可高下之列也二口則曰  
𠂔四口則曰𠂔皆指事也諸如此類者居多其于六  
書之學不如今人遠甚惟當竟尙空談之日而能研  
究六書留心古籍亦可謂豪傑之士矣卷中有愛日

精廬藏書朱文方印蓋卽張月霄藏書志所著錄者

元槩六書統跋

六書統二十卷題曰奉直大夫國子監司業楊桓弼  
集每葉十六行每行大約十字小字雙行每行二十  
三四字不等注文多以篆體作楷頗爲古雅版心有  
大小字數刻王姓名前有至大元年倪堅序門生劉  
泰序及桓自序卷末有至正二年八月江浙等處儒  
學提舉余謙補修一行桓之言曰許氏說文形聲最  
備其餘但千百字中一字間注象形會意指事餘皆  
略而不說意許氏漢人生近三代當知之其所引而  
不發者欲人存心鑒飫而自求之輒不自量取古文

篆籀之存者析爲六門凡三起草而後成書以凡文字之統而爲六也故名六書統又曰小篆雖出于秦非秦勑之周室旣弱書不同文秦統一之後盡得周史載籍之正乃削諸侯之紛雜還古文之本原其言頗爲前人所未發桓元史有傳其居魯之遼泉疏而爲辛泉因以自號見倪堅序則元史所不載也是書自至大元年江浙行省刊後至正時余謙補修五百餘年無重刻者明正德中其版猶存南國子監明亡始佚此猶元版元印恐此後流傳更少矣

陸師道手寫漢隸字源跋

漢隸字源五卷首有洪遵序前列攷碑分韻辨字三  
例諸碑字體偏旁及當用字韻所不能載者爲附字  
于後每頁十行每行約十字行欵格式與汲古閣刊  
本同惟提要稱漢魏碑三百有九魏晉碑三十有一  
此本碑目一卷漢魏晉并計實得碑三百有九檢之  
汲古本亦同豈提要所見別一本耶抑有誤記耶附  
字後有題記云嘉靖壬子十一月陸師道手錄奉衡  
山先生賜覽下有師道二字朱文連珠印子傳二字  
朱文長印案師道字子傳號元洲更號五湖長洲人

嘉靖戊戌進士初官工曹改禮部以母老乞歸凡十  
四年後以薦起官至尙寶卿隆慶初年告歸萬厯初  
卒年八十四少游文徵明之門工詩文善楷隸畫似倪  
元鎮夏忠愍言稱其文賈董書鍾王見明文苑傳  
無聲詩史姑蘇名賢小紀王子爲嘉靖三十一年當  
是五湖四十以後書正乞養家居時也卷中有青笠  
綠簑齋藏朱文方印季振宜字詵兮號滄葦朱文方  
印攷青笠綠簑齋爲雍正中長洲謝滄湄涖洲齋名  
蓋康熙中爲泰興季氏所藏後歸謝滄洲者

元槧說文字源跋

說文字源一卷題曰鄱陽周伯琦編注前有至正九年伯琦自序及自述敘贊先爲篆而以楷書釋文于後每頁八行注文雙行每行二十字篆文大字每約占小字六格卷末有男宗義同門人謝以信校正十二字蓋與正譌同時所刊也

元槧六書正譌跋

六書正譌五卷題曰鄱陽周伯琦編注前有至正五年宇文公諒序十一年伯琦自序後有十二年吳當後序卷五末有男宗義同門人謝以信校正十一字每頁八行篆文約占小字六格小字雙行每行二十字元刊元印本篆文圓勁楷書遒麗蓋以伯溫手書上版者明嘉靖元年有于器之重刊崇禎甲戌有胡正言重刻本行款雖同其字迹相去遠矣

四庫箸錄之本無伯琦自序吳當後序此則元板元印之完善者

元槧六書統溯源跋

六書統溯源十二卷題曰奉直大夫國子監司業楊  
桓弼集每頁十行每行篆文約占小字四格小字雙  
行每行二十三四字不等版心有字數及刊工姓名  
中有缺葉版心刻原缺二字恐余謙修版時已缺矣  
後有自序六書統以說文爲主而益以古籀此則凡  
說文所無或見于重文或見于玉篇廣韻集韻類篇  
者各爲篆文分指事會意形聲轉注四門子目亦與  
六書統同其意蓋以續說文自居耳天一閣書目有  
六書統書學正韻而無此書似明嘉靖時已難得矣

元槧書學正韻跋

書學正韻三十六卷題曰奉直大夫國子司業楊桓  
弼集與六書統六書溯源同時所刻行款字數刻工  
姓名皆同卷三十六後有至正二年八月江浙等處  
儒學提舉余謙補修一行元刊元印本桓旣作六書  
統溯源後以二書所收之字分韻編排爲此書先篆  
次隸省次譌體條理周詳字畫端整旣便檢閱亦可  
正流俗之譌

儀顧堂續跋卷第五

歸安陸心源伯剛甫著

宋蜀大字殘本漢書跋

漢書蜀大字本每葉十八行每行十六字小字雙行  
每行二十字版心有刻工姓名每卷有目連屬篇目  
首行大題在下篇名在上題正議大夫行秘書少監  
瑯琊縣開國子顏師古注立朗匡殷敬設竟境完桓  
貞徵慎恒讓等字皆缺避桓注淵聖御名構注今上  
御名與紹興初并憲度眉山重刊嘉祐七史款式同  
蓋亦紹興初蜀中刊本而孝宗時修改者世所稱蜀

大字本者也存卷六十四上下六十五至六十七六十九上中以汲古本互勘知毛本錯譌極多如匈奴傳上願寢兵休士士誤事俱無暴虐俱譌居下及魚鼈下譌不輝渠侯注輝渠魯陽縣也陽譌因案魯陽縣漢屬南陽郡晉屬南陽國北魏爲郡屬廣州今汝州魯山縣治若作閔則古今無此縣名也貳師罵曰罵譌怒欲發兵邀擊之邀譌怒死亡不可勝數亡譌于匈奴傳下願爲單于待使使譌史起亭墜注謂深開小道而行行譌而不當于匈奴稅不譌之未可以經遠也可譌必西南夷兩粵朝鮮傳西夷作南夷即

約滿爲臣臣上衍外字重合候得盧候者得譌毋列  
四郡四譌西外咸傳在襦襦中在譌皆王莽傳上令  
天下有法令譌今王莽傳下剛卯注或用玉今有玉  
玉皆譌五三年二月乙酉地震年譌月惜祇存此數  
卷耳有尙寶少卿袁氏忠徹朱文方印尙寶少卿朱  
文長印案袁忠徹字公達一字靜忠鄞縣人父珙精  
于風鑑忠徹得其傳永樂卽位授鴻臚寺序班累官  
尙寶司丞中書舍人終于尙寶少卿天順二年卒年  
八十三性好學博涉多聞詩有奇氣不僅以藝名見  
明史本傳及李賢袁公墓表黃潤玉袁公行狀胡儼

袁尚寶傳陳敬宗符台外集序稱忠徹退朝之暇日  
與縉紳文士磨礱諷詠故其收藏亦富余所收東坡  
書昆陽城賦亦忠徹舊藏也

宋槧蜀大字本後漢書殘本跋

後漢書一百二十卷首行小題在上大題在下范曄  
二字居中次行題唐章懷太子賢注每卷有目連屬  
正文每葉十行每行十六字注雙行擗注今上御名  
桓注淵聖御名與眉山刊七史行數匡格相仿當亦  
紹興初蜀中所刊世所謂蜀大字者也存卷六至卷  
十卷十六至十八卷二十一至二十九卷三十三至  
三十六卷三十八至五十九卷六十一至六十四卷  
六十至七十八卷八十二至八十五卷八十八共八  
十卷以汲古閣本互勘知毛本譌奪甚多如陰皇后

傳惟予與汝與譌惟明德馬皇后傳兄廖等卽時減  
削減譌減孝仁董皇后傳爲解犢亭侯脫亭字靈帝  
宋皇后傳渤海王惲譌勃以事問于羽林左監問  
譌聞靈帝何皇后傳皇天崩兮后土殯土殯譌土殯  
皇女義王傳封舞陽公主舞譌武鄧騭傳連求還第  
第譌弟中黃門李閏閏譌閏注況其後嗣乎下脫事  
具古史攷五字寇恂傳論于寇公而見之矣脫注論  
語孔子之言六字岑彭傳揚化將軍揚譌楊蓋延傳  
北度泗水泗上衍泗字陳俊傳俊撫貧弱俊下衍得  
字劉隆傳歲餘餘譌郡馬武傳後入綠林中後譌從

寶融傳泚陽公主泚譌泚馬援傳可伏牀下牀譌狀  
馬嚴傳則陰盛陵陽則譌明侯霸傳與車駕會壽春  
駕譌騎宋弘傳推進賢士推譌雅杜林傳嘗寶愛之  
寶譌實承宮傳車駕臨辟雍脫車字趙典傳李傕之  
傕皆譌傕張純傳務于無爲下脫註曹參惠帝時代  
蕭何爲相國遵蕭何法無所變更十九字樂必崩下  
脫注論語載宰我之言也八字曹褒傳尤好禮事事  
訛士鄭玄傳禮堂寫定傳于其人定傳譌傳定賈逵  
傳游情六藝情譌情張宗傳宗素多權謀素譌數度  
尙傳夫事有虛實夫譌大趙咨傳大司農陳奇奇譌

稀第五倫傳體晏晏之姿晏晏譌晏然鍾離意傳所  
部多蒙部譌步東海王彊傳吐血毀皆皆譌背張敏  
傳徵拜司空空譌位胡廣傳政令猶汗汗譌汗袁敞  
傳歷位將軍位譌爲情斷意訖訖譌其張繡傳祖文  
翁文譌父矯稱卿意矯譌驕郭躬傳奉車都尉尉譌  
護食邑二千戶戶譌石建宣二年甯譌武則可寄枉  
直矣枉譌往楊彪傳陽球陽譌楊河間孝王開傳及  
翼云翼譌儀張綱傳爲卜居宅卜譌十劉瑜傳未嘗  
不投書而仰歎嘗譌敢虞詡傳出城北郭門脫城字  
傳燮傳勉之下脫勉之二字張衡傳豈愛感之能割

能譌乃周勰傳未蒙省御未譌朱荀爽傳可爲鑒戒  
者爲譌謂李固傳還居黃門之官還譌遷趙岐傳箸  
孟子章句孟譌要郭泰傳初泰始至南州至名聞天  
下七十四字小註誤入正文許邵傳少峻名節峻譌  
俊何進傳太后之妹也妹譌甥宦者酷吏方術儒林  
文苑循吏逸民列傳脫目錄華佗傳病不得生得譌  
能徐登傳旣而饗熟熟譌孰臨水求渡船渡譌度逢  
萌傳字子康康譌慶井丹傳請丹不能致致譌制矯  
慎傳少好黃老好譌學袁譚傳見憎于夫人夫譌天  
任延傳造立校官造譌遣西域傳求救于曹宗下脫

宗字西夜國傳傳箭鏃傳譌傳此外注支之譌脫更不勝枚舉也范書明刊最多有正統本有嘉靖歐陽鐸本汪文盛本萬厯南北監本崇禎汲古閣本攷鄭元傳爲父母兄弟所容宋景祐本紹興監本蔡琪一經堂本元建康路本明正統本皆爲上無不字與唐史承節所撰鄭公碑合此本作不爲父母兄弟所容嘉靖歐汪二本萬厯南北監本毛本同則嘉靖萬厯四本當皆从此本出汲古出于監本而譌脫更甚又可見鄭元傳不字之妄增始于南宋矣

宋刻晉書跋

晉書一百三十卷小題在上大題在下次行題唐太宗文皇帝御撰前有貞觀二年御製序每卷版心紀志傳記各爲起訖每葉二十行每行十九字左線外有篇名匡削恆貞桓構慎敦暉皆爲字不成蓋南宋監本遞修至元止宋刊字體勁正版心有字數及刊工姓名元修版無且多俗體譌字明南監本謝鯤傳吾不復得爲盛德事矣句下脫去鯤曰何爲其然但使自今以往日忘日去耳初敦謂二十字此本不脫宣帝紀陸機王羲之二傳其論皆太宗自製故稱制

曰或者謂惟陸王二傳稱制曰亦不改之甚矣音義三卷前有天寶六載天王左史楊齊宣字正衡序行款與晉書同唐東京處士何超字令升所纂齊宣之內弟也超自言仿經典釋文之例注字以朱映朱映者謂以朱勾勒之也今不可見矣所引書如字林珠叢之類今皆不傳

宋槧宋印建本北史跋

北史一百卷首行大題在下小題在上每卷有目連屬篇目自皇后列傳起每篇有日題曰某某傳低四格每葉二十行每行十八字左線外有篇名版心有字數宋諱避至敦字止蓋光宗時刊本紙白如玉字體秀勁與福建蔡氏所刊史記草堂詩箋陸狀元通鑑內簡尺牘相似當亦蔡行父文子輩所刊校讎不精譌舛所不能免在宋刊中未爲上乘然偶以毛本互校可以證譌補缺者已多如魏太武紀造新字千餘字不譌字駕次本根山次不譌自復羯兒王爵羯

不譌判今制皇族肺腑肺腑不譌師傳齊高祖紀天  
柱大將軍太師師不譌史四日而至至不譌坐書背  
微點背不譌皆齊文宣紀癸巳行幸趙定癸不譌發  
馬乎入石室馬不譌男親自臨聽自不譌身齊孝昭  
紀召被帝罰者帝不譌立齊武成紀大破周軍于軹  
關軍不譌宣周太祖紀厯北長城大狩大狩不譌太  
守乃令蘇綽綽不譌州眾務猶歸臺閣歸不譌躍周  
孝閔紀陽平公李遠李不譌子周高祖紀以應楊忠  
忠不譌本周宣紀以時祭享享不譌奠隨文紀隋國  
公下不奪謚曰康皇祖楨爲柱國都督十三州諸軍

事同州刺史隋國公二十四字多爲妖變妖不譌禍  
陳留王傳光祿少卿不譌大夫論義感隣國不奪隣  
字平陽王傳禮之明文不奪文字穆崇傳與眞撰定  
碑文撰不譌選然好矜已凌物好不譌而論受事草  
創之際不奪受字崔浩傳今留守舊都分家南徙都  
分不譌是國聖業方隆不缺業字長孫道生傳乃切  
責子弟弟不譌切長孫紹遠傳則奏黃鍾下不奪作  
黃鍾三字于仲文傳回擊大破之回不譌因于寧敏  
傳周祚所以靈長祚不譌士王晞傳對晞焚之焚不  
譌聞鉗配甲坊坊不譌方非不愛作熱官熱不譌孰

封隆之傳子君確君靜不缺靜字封郟城子郟不譌  
珍古弼傳嘉其直而有用直不譌真張烈傳位諫議  
大夫下不奪烈弟僧皓字山客歷涉羣書工于談說  
有名于當世以諫議大夫二十五字袁翻傳實賴忠  
良忠不譌溫祖珽傳武成于天保下不奪世字此外  
形近之譌不下千餘南北監本官本大都與宋刊同  
遠勝毛本惟皇族肺腑二字多爲妖變之祇撰定碑  
文之撰回擊大破之回封郟城子之郟直而有用之  
直諸本譌與毛本同賴此本正之每冊有季振宜藏  
書朱文長印延陵宋版書目箸于錄

宋槧明修宋書跋

宋書一百卷次行題臣沈約新撰小題在上大題在下每葉十八行每行十七字版心有字數及刻工姓名紹興眉山刻七史之一有宏治四年嘉靖八年九年十年修版志第十二末有校語云聖人制禮樂一篇巾舞歌一篇按景祐廣樂記言字訛謬聲辭雜書朱鼓吹鐃歌辭四篇舊史言詁不可解漢鼓吹鐃歌十八篇按古今樂錄皆聲辭豔相雜不復可分列傳第六有云臣穆等案高氏小史趙倫之傳下有到彦之傳而此獨闕約之史法諸帝稱廟號而謂魏爲虞

今帝稱帝號魏稱魏主與南史體同而傳末又無史臣論之非約書然其辭差與南史異故特存焉按二条北本扉入正文官本仍之汲古本志十二連正文列傳列于後愚謂此皆嘉祐諸臣校語也晁公武于南齊梁陳魏周各書皆言何人校上宋書獨闕今以穆等二字推之蓋鄭穆所校也穆在館閣三十年嘗編集賢院書籍見宋史本傳嘉祐校刊七史諸臣校上皆序其端此書必有穆序惟晁公武不能辨爲穆校恐紹興重刻時序已缺矣高氏小史有到彥之傳今約書仍闕則除魏書外無以小史補綴可知

更可證錢宮詹北齊攷異之非而信余言之不謬矣  
約書例稱魏爲虜列傳第六張暢傳多稱魏主與南  
史例同而文不同鄭穆疑非約書愚謂暢傳多與魏  
臣李孝伯問答之辭非史臣之辭故言必稱魏主史  
從實書不能改而稱虜未必非約原書穆說非是惟  
少帝紀有稱魏主魏軍者乃約書殘闕後人以他書  
補之亦非出高氏小史或取之齊冠軍錄事參軍孫  
嚴宋書則不可知耳紹興周季貺太守藏有一部無  
一修板有文淵閣印季滄葦印卽季氏書目所箸錄  
者爲明文淵閣舊物其半宋版宋印其半則元末明

初印本必有可以正今本之謬奪惜其書已歸僉父  
不能借校矣

宋槧明修魏書跋

魏書一百十四卷不題魏收銜名前有臣放臣恕臣  
燾臣祖禹敘放者劉放恕者劉恕燾者梁燾祖禹者  
范祖禹也行款格式宋諱闕避皆與宋書同眉山刻  
七史之一修至嘉靖十年止卷三卷十二卷十三卷  
十四卷十五卷十七卷十八卷十九上卷二十五卷  
三十卷三十三卷八十二卷八十三上下卷八十四  
卷八十六八十七卷九十九十一九十二卷一百一  
一百二卷一百五一百六皆有校語序所謂各疏于  
卷末者是也汲古本同改作雙行小字惟八十二校

語云收書列傳七十亾汲古本亾譌終卷八十七校  
語云魏收書節義傳亾汲古本譌作列傳七十五終  
北監本卷三卷二十七卷二十五卷八十七校語缺  
餘皆同乾隆官本則列入考証矣卷十六道武七王  
傳缺第十六頁嘉靖九年補刻空格一頁北監本謚  
曰哀王下註闕一枚三字汲古本留黑版十行卷末  
無諸臣校語嘉祐時不缺可知其缺當在宋以後嘉  
靖以前矣韋園傳末又有武功蘇湛云云者言又有  
武功人蘇湛也此史家附傳通例又有武功四字宋  
本在第十頁第十四行之末蘇湛二字在十五行之

首校刻北監本者誤以蘇湛爲提行別起而以又有  
武功四字連屬遵弟翬傳燕郡太守下則不可通矣  
卷三十八刁雍傳附其子纂遵紹獻融肅肅後復敘  
遵事而後敘遵之子十三人汲古本遵傳末注云遵  
字疑皆作肅謬甚然可見收書于附傳諸人本不提  
行其提行者嘉祐諸人校刊之失也

魏書地形志集釋跋

魏書地形志集釋三卷題烏程溫曰鑑鐵華箸案曰鑑字霽華號鐵華烏程監生从楊鳳苞邢典學好蓄書並嗜金石文字收書地形志承兩漢書遺法兼載古迹非若後代史志專載沿革曰鑑博考水經注兩漢志晉志宋志隋志元和郡縣志太平寰宇記九域志爲之注釋用力頗勤惟杜氏通典州郡門考訂甚詳足與魏書相証明溫氏失收似近于陋其書初名攷異改名攷証後乃定今名此本旁行斜上猶其手稿也繆小山太史擬欲梓行曾錄副寄之

宋槧明修梁書跋

梁書五十六卷次行題散騎常侍姚思廉撰行款格式與宋書同眉山重刻七史之一修至嘉靖十年止惟字畫刊工均不及宋齊北齊陳魏周六書之精嘉祐崇文院本亡缺必少故每卷後無一校語然以校北監及汲古本頗有此善于彼者北監本于姚思廉銜名上加唐字可也汲古本削去姚思廉銜名不但與嘉祐校刊舊式相背與新舊唐書晁陳書目箸錄皆不合矣北監本目錄移大題在上小題在下猶可言也汲古本每卷削去大題統排卷第而于本紀列

傳之首低一格各出本紀列傳二字竟如時文目錄以學庸論孟分類可乎且毛氏所刻各史皆不如也其奪謫之甚者如卷五博覽則大哉無所與名缺博字覽謫覺卷七徐妃傳祖孝嗣大尉枝江文忠公父緄侍中文謫父緄謫他葬江陵瓦官寺下衍父字卷八昭明太子傳不使我恆爾懸心缺恆字卷三十一末頗欲綜理脫欲字綜理誤提行嗚呼下脫傷風敗俗留莫之晤永嘉不競十二字卷三十八朱異傳遠歸本朝謫遠歸聖期賀琛傳爲歡祇在俄頃脫頃字此外一二之謫奪更難枚舉

宋槧明修南齊書跋

南齊書五十九卷次行題曰臣蕭子顯撰前有臣恂  
臣寶臣臣穆臣藻臣洙臣覺臣彥若臣鞏序行欵格  
式與宋書同宋諱避至構字止紹興十四年眉山重  
刻七史之一也本紀策一末有校語云策文難滅星  
謀疑志第十末云漆畫牽車注戍棟梁本戍作戈輿  
車注戍校棟梁一本戍校作戍枝衣畫車注刺代棟  
梁平乘車注刺代棟梁並疑列傳六末賴一作節大世  
疑列傳二十二末云張融海賦文多脫誤諸本同列  
傳三十九末云量廣始登疑案各條皆曾鞏等所記

也萬厯十年南監本仍之萬厯三十四年北監本乾隆四年官刊本崇禎汲古閣本皆無志第七缺第三頁列傳第十六缺第十頁列傳第二十五缺第六頁列傳第三十九缺第五頁嘉靖九年修板重刻第十四葉版心刻五字以補之北監南監乾隆官本所缺皆同汲古留墨版南北監及官本皆留空白其缺當在弘治以後嘉靖以前何以言之宋書有弘治四年修版此本有嘉靖修而無弘治修則弘治時不缺可知則不但嘉祐時不缺卽紹興眉山重刻亦斷無缺頁矣惟列傳第四十江南匈奴傳王士隆上空一格

北監註缺字官本同汲古本空一格若夫九種之事  
有下空二格旁註缺字北監本同官本註缺二字汲  
古本空二格此二處缺文恐眉州重刻已然不始于  
明矣李繪傳以此久而屈沉卒毛本同惟沉謫爲況  
北監本下有贈南青州刺史謚曰景九字此則必李  
騰芳校勘時以北史補之耳序末列名諸臣錢竹汀  
考爲錢藻孫洙孫覺丁寶臣趙彥若曾鞏而臣恂臣  
穆未及愚謂穆者鄭穆侯官人字閔中曾官集賢院  
校勘見宋史本傳恂疑楊恂四川人入元祐黨籍宋  
史附家愿傳是本凡嘉靖八年修版六十五葉九年

修版七十一葉十年修版六十五葉宋刊尙存十分  
之八

宋刊明修北齊書跋

北齊書五十卷次行題隋太子通事舍人李百藥撰  
行款格式與宋書同紹興十四年眉山刊七史之一  
修至明嘉靖止本紀第三末有校語云臣等詳文襄  
紀其首與北史同而末多出於東魏孝靜紀其間與  
侯景往復書見梁書景傳其所序列傳尤無倫次蓋  
雜取以成此書非正史也本紀第五第七列傳第二  
第四第六第七第二十五第二十六第二十七卷末  
有云此卷牽合北史而成第二十一卷末云此卷雖  
北史而無論贊尙非正史卷二十九末云此傳與北

史同而不序世家又無論贊疑非正史愚案以上各條皆嘉祐時校刊諸臣所記與陳書南齊書同曾鞏陳書序所謂特疏于篇末者是也萬厯南監本尙仍其舊至汲古閣本始盡去之錢氏竹汀廿二史攷異以卷四校語爲嘉祐諸臣所記餘皆明人所記良由未見蜀大字本故耳李延壽之撰北史百藥之撰此書皆不能憑空結撰必取材于王邵之齊志崔子發杜臺卿之齊紀百藥書又成于延壽之前愚意與北史同者難保非延壽用百藥書修其與北史大同小異者當皆本之王杜崔三家若謂殘缺之後後人以

高氏小史補綴則校魏書者既屢引高氏小史爲證校此書者何獨引北史而不及小史乎其非以小史補綴有必然者惟崔杜王三家之書北宋已亡非若宋時館本魏書有白簽可據故以非正史三字渾言之耳錢氏以書中無序贊而與北史異者爲出高氏小史愚未敢謂然文宣紀之末汲古閣本脫乘駝馳牛驢至飲酒麴蘖三百五十六字列傳二十一李繪傳未幾遂下奪通急就章至袁狎曰三百四字而屏入高隆之傳啟出爲北道行臺至冒字止三百餘字蓋毛氏所據之本與此本同而殘缺更甚卷四缺第

三十二頁卷二十一缺第三頁而以卷十八之第十三頁當之無怪文義之不續矣毛刊十七史北齊最爲草率惜此本亦多明修之版又多斷爛之文不能逐一校正之耳百藥結銜之誤宋本已然錢氏蔽罪明人冤矣

宋槧周書跋

周書五十卷大題在下小題在上次行題令狐德棻等撰前有臣熹臣安國臣希校上序熹者梁熹安國者王安國希者林希也每頁十八行每行十七字版心有字數及刊工姓名列傳第二十二二十三後有校語兩行卷數以紀傳爲起訖紹興十四年蜀眉山刊本修至明嘉靖十年止以汲古閣本校一過毛本譌奪甚多乃知宋本之善卷一韓軌韓不譌元侯景之克臺城也克不譌充出自輿阜阜不譌皇此爲上策不缺策字李賢將精騎一千騎不誤兵魏孝武帝

崩不奪武字卷二建忠王万俟卨普撥忠不譌中卷三  
太史陳祥瑞史不譌師其當州租賦租不譌祖臣無  
復子之請子不譌于卷四末享年不永下不脫嗚呼  
二字卷五萬物不昌昌不譌長卷六十一月己亥改  
置司內官員己亥改不譌庚寅曰景子陳遣使來聘  
子不譌寅陳不譌友僞丞相阿那瓌瓌不譌肱口二  
千萬六千八百八十六八百不譌六百卷七冬十月  
歲星犯軒轅歲不譌癸巳祠太廟祠不譌祀無忘  
鑒寐寐不譌味卷九大象元年元不譌未捐婚姻之  
彝序不脫彝字卷十一晉公護傳次者屬兔兔不譌

免永畢生願永不譌未馮遷傳遷本寒微不脫微字  
卷十三秦王贊傳忠誠公靖智不脫公字卷十五于  
謹傳親自袒割袒不譌祖卷十九達奚武傳遣武从  
兩騎佔候動靜兩不譌而楊忠傳與達武援之援不  
譌授卷二十賀蘭祥傳宜陽縣公下缺四字脫高祖  
于并州至襄樂縣公六十字卷二十二論並遭逢興  
運並不譌益二十三蘇綽傳天下之治治不譌士卷  
二十五李賢傳以絕援軍絕不誤一卷二十六長孫  
紹遠傳碩乃歎服歎不譌款卷二十七蔡祐傳太祖  
每歎之每不譌乃田弘傳高琳琳不譌珠乃還江陵

不缺陵字梁椿傳隴東郡守上不脫出爲二字弘農  
不譌弘濃卷二十八權景宣傳可以計取之計不譌  
討郭賢傳除迎師中大夫不奪迎字二十九王傑傳  
進位大將軍位不譌爵高琳傳賜爵許昌縣公縣不  
譌郡卷三十竇熾傳廣武郡公武不譌成毅字大武  
大不譌天三十二盧柔傳時沙苑之後時不譌事唐  
瑾傳退朝休假假不譌暇三十三楊薦傳卿歸語行  
臺迎我歸不譌等趙剛傳傍乙載忿忿不譌忽趙利  
傳千遷鎮陝遷不譌還三十四元定傳遂爲度所執  
下不脫所部二字楊擲傳關中貧校中不譌史豎大

木于岸木不譌水卷末前哲所難下脫趙善等或行  
彰于孝友或誠顯于忠概或躬志力俱徇功名兵凶  
戰危城孤援絕揚敷三十字三十五鄭孝穆傳以疾  
不之部部不譌郡崔猷傳當今之要地今不譌世三  
十六楊纂傳乃間行歸款間不誤問裴果傳李慶保  
降不缺降字三十七張軌傳撫軍將軍撫不譌無三  
十八薛寘傳諡曰理理不譌禮卷三十九辛慶之傳  
凶狡狂悖狡不譌奴杜果傳遷溫州下空八格不衍  
刺史二字四十一王褒傳江南燠熱燠不譌煥庾信  
傳風飛雷激激不譌散四十二蕭世怡傳不尙苛察

察不譌蔡蕭圓肅傳遂不之部部不譌郡右史書事  
書不譌記劉璠傳將致大禍致不誤至四十三韋祐  
傳王公避難避不譌被四十四泉企傳朝廷嘉之嘉  
不譌喜李遷哲傳車騎大將軍車不譌年陽雄傳頻  
典二郡二不譌三四十盧誕傳營邱下不脫成周  
二字沈重傳周禮音一卷下不脫儀禮音一卷五字  
樂遜傳通賈服說服不譌成卷末不失守令失不譌  
火四十七褚該傳人皆敬而信之不脫人字四十八  
蕭譽傳百姓稱而安之稱不譌撫疆土旣狹土不譌  
上每誦老馬伏櫪每不譌母四十九宕昌傳殺牛羊

以祭天殺不譌役十六年年不譌千傍乞鐵葱葱不  
譌忽氏傳據陰平自稱王不脫王字五十卷突厥傳  
父兄伯叔不脫兄字吐谷渾傳伏乞觸拔抄不譌拔  
波斯傳瑟瑟不譌琴瑟凡无不作無閤不作閤諡不  
作諡均勝毛本周主之名如邕毓等字唐祖李虎之  
虎皆以諱代不書其名蓋周史本有柳虬牛弘二家  
蔡本二家而成書邕毓不書名用柳史而改之未淨  
者太清閣本當出唐代流傳李虎不書名宋嘉祐以  
唐抄付刊改之未淨者梁肅等序不言有缺失不應  
紹興眉山覆刊遽以北史補之其與北史同者安知

非同採柳牛二史乎文淵閣書目有周書四部想其  
時宋刊完本必多明人刊書粗莽兩監重刊並不求  
善本補全北監雖較勝南監亦如唯之與阿毛氏重  
雕竟以南監爲祖由是此書無完本矣

宋槧宋印蜀大字本陳書跋

陳書三十六卷小題在上大題在下次行題散騎常侍姚思廉撰每頁十八行每行十七字首目錄後有臣恂臣穆臣藻臣覺臣彥若臣洙臣瓘校上序版心有字數及刊工姓名紀傳各爲起訖弘匡循徵敬恆貞慎皆爲字不成卷一卷三卷九卷十六卷二十八後皆有校語序所稱其疑者亦不敢損益特各疏於篇末是也汲古閣刊本亦從此出削其校語目錄卷一卷三卷四卷五卷六下各衍小注數字譌奪亦多如卷一封陳公策衣製杖戈本左氏哀二十七年傳

文製雨衣也毛刊誤作乘羽枝戈卷四慈訓太后令  
嬪嬙弗隔弗隔者言不隔絕嬪嬙也毛本弗隔謫中  
角卷六禎明二年有羣鼠無數自洲岸入石頭毛本  
洲謫州州上行蔡字卷二十二錢道戢傳以功拜直  
閣下奪將軍除員外散騎常侍假節東徐州刺史封  
永安縣侯邑五百戶二十五字此外一二字之謫奪  
不可枚舉詳見羣書校補陳諱如霸先禕頊等字間  
或作諱蓋思廉承顧野王傳絳舊文而刪之未盡者  
唐諱虎字或作獸或作武宋刻仍唐本舊文而改之  
未盡者宋嘉祐中以宋齊梁陳北齊周書外謬亡闕

始詔館職讎校曾鞏等以秘閣所藏多誤不足憑以  
是正請訪天下藏書之家悉上異本久之始集治平  
中鞏校定南齊梁陳三書上之劉恕上後魏書王安  
國上北周書政和中始皆畢頒之學官民間傳者尙  
少未幾遭靖康丙午之變中原淪陷書幾亡紹興十  
四年井憲孟爲四川漕始檄諸州學官求當日所頒  
本時四川五十餘州皆不被兵書頗有在往往亡缺  
不全收合補綴獨少後魏十許卷後得宇文季蒙家  
本偶有所少者于是七史遂全因命眉山刊行見昭  
德郡齋讀書志此卽眉山所刻七史之一也世謂之

蜀大字本明洪武中取天下書版實京師其版遂歸  
南京國子監遞有修補至萬厯時始亡此本宋刻宋  
印絕無修版誠可寶也卷四卷十四卷二十二卷三  
十六後有史西邨人白文方印子孫保之白文方印  
史鑑之印白文方印間有文徵明印白文方印案史  
鑑字明古吳江人號西邨隱居不仕藏書畫甚富著  
有西邨集見吳文定集序爲曾鞏所作見元豐類藁